

食貨典第四十卷

農桑部紀事二

宋書袁湛傳湛弟豹爲劉毅撫軍諮議參軍領記室毅時建議大田豹上議曰國因民以爲本民資食以爲天修其業則教興崇其本則末理實爲治之要道致化之所階也不數其本則末業滋章饑寒交湊則廉恥不立當今接篡僞之末值凶荒之餘爭源既開彫薄彌散榮利蕩其正性賦斂罄其所資良疇無側趾之耦比屋有困餒之患中間多故日不暇給自卷甲却馬甫一二年積弊之繁難用克振實仁懷之所矜恤明教之所爰發也然斯業不修有自來矣司牧之官吳或爲務俗吏庸近猶秉常科依勸督之故典迷民情之屢變譬猶修隄以防川忘淵丘之改易膠柱於昔弦忽宮商之乖調徒有考課之條而無毫分之益不悟清流在於澄源止輪由乎高閼患生於本治之於末故也夫設位以崇賢疏爵以命士上量能以審官不取人於浮譽則比周道息遊者言歸遊子旣歸則南畝闢矣分職以任務置吏以周役職不以無任立吏必以非用省冗散者廢則萊荒墾矣器以應用商以通財勦靡麗之巧棄難得才其彫僞者賤穀稼重矣耕耨勤悴力殷收寡工商逸豫用淺利

深增賈販之稅薄疇畝之賦則未技抑而田峻喜矣居位無儀從之徒在野靡兼并之黨給賜非可恩致力役不入私門則游食者反本肆勤自勸游食省而肆勤衆則東作繁矣密勿者甄異怠慢者顯罰明勸課之令峻糾違之官則懶惰無所容力田有所望力者欣而惰者懼則穡人勸矣凡此數事亦務田之端趣也茲之以清心鎮之以無欲勸之以無倦翼之以廉謹舍日計之小成期達致於莫歲則澆薄自淳心化有漸矣

南史宋武帝本紀上微時躬耕於丹徒及受命耨耜之具頗有存者皆命藏之以留於後及文帝幸舊宮見而問焉左右以實對文帝色慙有近侍進曰大舜躬耕歷山伯禹親事土木陛下不覩列聖之遺物何以知稼穡之艱難何以知先帝之至德乎

宋書申恬傳恬爲青州刺史加督冀州齊地連歲興兵百姓凋弊恬初防衛邊境勸課農桑二三年間遂皆優實

周朗傳朗爲通直郎世祖卽位除建平王宏錄事參軍時普責百官讜言朗上書有曰農桑者實民之命爲國之本有一不足則禮節不興若重之宜罷金錢以穀帛爲賞罰然愚民不達其機議者好

增其異凡自淮以北萬匹爲市從江以南千斛爲貨亦不患其難也今且聽市至于錢以還者用錢餘皆用絹布及米其不中度者坐之如此則墾田自廣民資必繁盜鑄者罷人死必息又田非膠水皆播麥菽地堪滋養悉栽紵麻蔭巷緣藩必樹桑柘列庭接宇唯植竹栗若此令既行而善其事者庶民則叙之以爵有司亦從而加賞若田在草間木物不植則撻之而伐其餘樹在所以次坐之又取稅之法宜計人爲輸不應以貲云何使富者不盡貧者不蠲乃令桑長一尺圍以爲價田進一畝度以爲錢屋不得瓦皆責貲實民以此樹不敢種土畏妄墾棟焚榱露不敢加泥豈有剝善害民禁衣惡食若此苦者方今若重斯農則宜務削茲法

南齊書劉善明傳善明爲海陵太守郡境邊海無樹木善明課民種榆櫟雜菓遂獲其利

南史范雲傳齊文惠太子嘗幸東田觀穫稻雲時從文惠顧雲曰此刈甚快雲曰三時之務亦甚勤勞願殿下知稼穡之艱難無徇一朝之宴逸也文惠改容謝之

梁書沈瑀傳瑀永泰元年爲建德令教民一丁種十五株桑四株柿及梨栗女丁半之人咸歡悅頃之成林

孫謙傳謙天監六年出爲輔國將軍零陵太守謙爲縣常勤勸課農桑務盡地利收入常多於鄰境徐摛傳摛爲新安太守至郡爲治清靜教民禮義勸課農桑期月之中風俗便改

陳書姚察傳元帝授察原鄉令時邑境蕭條流亡不反察輕其戰役勸以耕種於是戶口殷盛民至今稱焉

魏書呂羅漢傳羅漢父溫爲上黨太守善勸課有治名

高允傳允拜中書博士遷侍郎世祖與論刑政言甚稱旨因問允曰萬機之務何者爲先是時多禁封良田又京師遊食者衆允因言曰臣少也賤所知唯田請言農事古人云方一里則爲田三頃七十畝百里則田三萬七千頃若勤之則畝益三升不勤則畝損三升方百里損益之率爲粟二百二十萬斛況以天下之廣乎若公私有儲雖遇饑年復何憂哉世祖善之遂除田禁悉以授民

源賀傳賀子懷持節巡行北邊表曰景明以來北蕃連年災旱高原陸野不任營殖唯有水田少可蓄畝然主將參僚專擅腴美瘠土荒疇給百姓因此困敝日月滋甚諸鎮水田請依地令分給細民先貧後富若分付不平令一人怨訟者鎮將已下連署之官各奪一時之祿四人已上奪祿一周北

鎮邊蕃事異諸夏往日置官全不差別沃野一鎮自將已下八百餘人黎庶怨嗟愈曰煩猥邊隅事
勢實少畿服請主帥吏佐五分減二詔曰省表具恤民之懷已勅有司一依所上下爲永準如斯之
比不便於民損化害政者其備列以聞時細民爲豪彊陵壓積年枉滯一朝見申者日有百數所上
事宜便於北邊者凡四十餘條皆見嘉納

崔元伯傳清河崔寬長子衡除秦州刺史先是河東年饑刼盜大起衡至修龔遂之法勸課農桑周
年之間寇盜止息

杜纂傳纂爲清河內史勸督農桑親自檢視勸者賞以物帛惰者加以罪譴弔死問生甚有恩紀
周書郭彥傳彥爲澧州刺史蠻左生梗未遵朝憲至於賦稅違命者多聚散無恆不營農業彥勸以
耕稼禁其遊獵民皆務本家有餘糧亡命之徒咸從賦役先是以澧州糧儲乏少每令荊州遞送自
彥蒞職倉庾充實無復轉輸之勞

隋書公孫景茂傳景茂爲道州刺史好單騎巡人家至戶入闔視百姓產業有修理者於都會時乃
褒揚稱述如有過惡隨卽訓導而不彰也繇是人行義讓有無均通男子相助耕耘婦人相從紡績

大邨或數百戶皆如一家之務

唐書李大亮傳大亮授土門令方歲饑境多盜賊大亮招亡散撫貧瘠賣所乘馬稍稍資業之勸墾田歲大熟

李襲志傳襲志弟襲譽嘗謂子孫曰吾貢京有賜田十頃能耕之足以食河內千樹桑事之可以衣能勤此無資於人矣

張儉傳儉遷朔州刺史大教民營田歲收穀數十萬斛徙代州遂檢校代州都督儉勤墾田力耕歲數稔私蓄富實

舊唐書竇威傳威兄子軌貞觀元年徵授右衛大將軍二年出爲洛州都督洛陽因隋末喪亂人多浮僞軌並遣務農各令屬縣有遊手怠惰者皆按之由是人吏懾憚風化整肅

唐書岑文本傳文本除祕書郎兼直中書省太宗旣籍田文本奏籍田頌文致華贍

王方翼傳方翼以功遷夏州都督屬牛疫民廢田作方翼爲耦耕法張機鍵力省而見功多百姓順

賴

張說傳說遷左補闕久視中后追暑三陽宮沆秋未還說上疏曰關西小旱耕稼是憂安東近平輪漕方始臣願及時旋軫深居上京息人以展農罷不急之役省無用之費澄心澹懷惟億萬年蒼蒼羣生莫不幸甚

蘇瓌傳瓌從父兄幹垂拱中遷魏州刺史河朔饑前刺史苛暴百姓流徙幹檢吏督姦勸課農桑由是流冗盡復以治稱

韓思彥傳思彥子琬拜監察御史景雲初上言貞觀永徽之間農不勸而耕者衆其故奈何雜以皇道也

裴濯傳濯累進中書舍人睿宗造金仙玉真二觀濯上言春夏不可興土功妨農事今東作云始丁壯就功妨多益少饑寒有漸宜下明制令二京營作和市木石一切停止有如農桑失時戶口流散雖寺觀營立能救饑寒敝哉

宇文融傳融拜御史中丞帝詔建常平倉益貯九穀權發斂官司勸作農社使貧富相恤凡農月州縣常務一切罷省使趨刈穫

裴行儉傳儉子倩字容卿歷信州刺史勸民墾田二萬畝以治行賜金紫服

崔衍傳衍擢明經調清源令勸民力田

馮伉傳伉遷膳部員外郎爲睦王等侍讀醴泉令缺遂以授伉縣多鬲猾數犯法伉爲著諭蒙書勸之務農

徐申傳申遷韶州刺史按公田之廢者募人假牛犁墾發以所收半畀之田久不治故肥美歲入凡三萬斛諸工計所庸受粟有差

劉昌傳昌授京西行營節度使改四鎮北廷行營兼涇原節度在邊凡十五年身率士墾田三年而軍有羨食

孟元陽傳元陽史失其何所人起陳許軍中爲大將使董作西華屯盛夏屬而立於塗役休乃就舍故田輒歲稔而軍食常足

盧坦傳坦遷戶部侍郎判度支表韓重華爲代北水運使開廢田

韋丹傳丹爲容州刺史教民耕織始城州周十三里屯田二十四所教種茶麥仁化大行

柳宗元龍城錄余南遷度高鄉道逢老叟年少於路次講明種藝其言深耕耨種時耘時耔却牛馬之踐履去螟螣之戕害勤以朝夕滋之糞土而有秋之利蓋富有年矣若夫堯湯之水旱霜雹之不時則在夫天也

唐書李寶臣傳寶臣子惟簡爲鳳翔節度使市耕牛佃具給農歲增墾數十萬畝

楊憑傳憑弟凝董晉表爲判官亳州刺史缺晉以凝行州事增墾田決汙塹築隄防水患訖息

劉蕡傳蕡擢進士第遷神策中尉大和二年舉賢良方正能直言極諫蕡對曰臣願斥游惰之人以篤耕殖

冊府元龜開成元年十二月壬子御紫宸殿謂宰臣曰深以宿麥爲憂今日東風應卽有雪鄭覃對曰正月得之亦未爲晚

唐書韋丹傳丹子宙爲永州刺史民貧無牛以力耕宙爲置社二十家月會錢若干探名得者先市牛以是爲準久之牛不乏

陸龜蒙傳龜蒙少高放通六經大義居松江甫里有田數百畝屋三十楹身舂鋤株刺無休時

十國春秋前蜀高祖紀武成三年六月下詔勸農桑曰昔劉先主入蜀武侯勸其閉關養民十年而後舉兵震搖關內朕以猥眇托居人上爰念蒸民久罹干戈之苦而不暇力於農桑之業今國家漸寧民用休息其郡守縣令務在惠綏無侵無擾使我赤子樂於南畝而有豳風七月之詠焉

五代史韓建傳建爲華州刺史華州數經大兵戶口流散建少賤習農事乃披荆棘督民耕植出入閭里問其疾苦

冊府元龜後唐張全義唐末爲河南尹雒都自黃巢大亂之後繼之以蔡賊十餘年間寇盜往來都城灰燼無寸椽尺椳滿目荆榛李罕之尹正也唯部下聚居坊市窮民不滿百戶加以罕之貪殘治民無術流人來者尋復散去及全義爲尹鉏耒拔榛招復流庸待之如子每歲農務勸耕之始全義必自立畎畝間諭其耕者賞以酒食政寬事簡吏不敢犯由是數年之間京畿無閑田民戶數十萬周知裕明宗朝歷絳州潞州刺史宿州團練使知裕老於軍旅勤於稼穡凡爲郡勸課皆有政聲朝廷嘉之

記纂淵海後唐明宗時大有年唐主與馮道從容問曰今歲雖豐百姓贍足否道曰農家歲凶則死

於流殍歲豐則傷於穀賤豐凶皆病惟農夫爲然臣記韞夷中詩二月賣新絲五月糶新穀醫得眼前瘡剜却心頭肉語雖鄙俚曲盡農家之情狀上命錄其詩嘗諷誦之

遼史太祖紀贊遼之德祖卽太祖之父德祖弟述瀾北征於厥室韋南略易定奚霫始興板築置城邑教民種桑麻習織組

五代史劉審交傳審交遷陳州防禦史出視民田見民耕器薄陋乃取河北耕器爲範爲民更鑄十國春秋後蜀後主紀廣政十五年春正月下詔勸農

宋史陶穀傳穀仕周爲翰林學士顯德三年遷兵部侍郎加承旨世宗留心稼穡命工刻木爲耕夫織婦蠶女之狀置於禁中思廣勸課之道穀爲贊辭以進

玉海太宗興於側微民事固無不知恐富貴而忘之也每臨朝無一日不言及稼穡 太宗遊金

明池召田婦數十人於殿上賜席使坐問以民間疾苦田婦愚戇無所隱避賜帛遣之 眞宗乳

母秦國夫人劉氏本農家也喜言農事眞宗自幼聞之故爲開封尹以善政著聞及踐大位咸平景德之治爲有宋隆平之極景德農田勅至今稱爲精當

宋史呂夷簡傳夷簡知濱州代還奏農器有算非所以勸力本也遂詔天下農器皆勿算

玉海眞宗遇風雨稍甚密遣人擷桑枝禾穗觀之或無傷則喜形於色又於內殿植稻麥暇日臨觀刈穫欲知田畝之勞

眞宗幸太乙宮大雪帝謂宰相曰雪固豐稔之兆第民力未充慮失播種卿等其務振勸毋遺地利

咸平四年十一月丁亥上御龍圖閣召輔臣觀太宗草行飛白篆籀

八分書及闕古今名畫移御延和殿閱張去華所著元元論國田圖上曰經國之道必先養農務穡爲先朕嘗冀邊鄙稍寧兵革粗息則可以力行其事富庶吾民矣

宋史陳靖傳靖平生多建畫而於農事尤詳嘗取淳化咸平以來所陳表章目曰勸農奏議錄上之然其說泥古多不可行

邢昺傳昺進位禮部尙書上勤政憫農每雨雪不時變形於色以昺素習田事多委曲訪之初田家察陰晴豐凶皆有狀候老農之相傳者率有驗昺多采其說爲對

趙尙寬傳尙寬知唐州唐素沃壤經五代亂田不耕土曠民稀賦不足以充役議者欲廢爲邑尙寬曰土曠可益墾闢民稀可益招徠何廢郡之有乃按視圖記得漢召信臣陂渠故迹益發卒復疏三

陂一渠溉田萬餘頃又教民自爲支渠數十轉相浸灌而四方之民來者雲布尙寬復請以荒田計口授之及貸民官錢買耕牛比三年榛莽復爲膏腴增戶積萬餘尙寬勤於農政治有異等之效三司使包拯與部使者交上其事仁宗聞而嘉之下詔褒焉仍進秩賜金留於唐凡五年民像以祠而王安石蘇軾作新田新渠詩以美之又徙梓州尙寬去唐數年田日加闢戶日益衆朝廷推功自少府監以直龍圖閣知梓州積官至司農卿

錢惟演傳惟演從弟易子彥遠爲右司諫上疏曰農爲國家急務所以順天養財禦水旱制蠻夷之原本也唐開元戶八百九十餘萬而墾田一千四百三十餘萬頃今國家戶七百三十餘萬而墾田一百一十五萬餘頃其間逖廢之田不下三十餘萬是田疇不闢而游手者多也勸課其可不興乎本朝轉運使提點刑獄知州通判皆帶勸農之職而徒有虛文無勸導之實宜置勸農司以知州爲長官通判爲佐舉清強幕職州縣官爲判官先以墾田頃畝及戶口數屋塘山澤溝洫桑柘著之於籍然後設法勸課除害興利歲終農隙轉運司考校之第其賞罰

高賦傳賦知唐州州田經百年曠不耕前守趙尙寬墾不遺力而榛莽者尙多賦繼其後益募兩

河流民計口給田使耕作陂堰四十四再滿再留比其去田增闢三萬一千三百餘頃戶增萬一千三百八十歲益稅二萬二千二百五十七璽書褒諭宣布治狀以勸天下兩州爲立生祠

玉海紹興五年三月甲午上曰朕令宮中養蠶庶知稼穡艱難

紹興中於潛令樓璿畫耕織二

圖四十五事爲五言詩四十五章高宗召對以進呈宣示後宮嘉定中樓鑰以是圖上東宮

宋史李燾傳燾除湖北轉運副使陞辭以欲速變古爲戒又奏禹貢九州荆田第八賦乃在三人功既修遂超五等今田多荒蕪賦虧十八上命之條畫既至奏京湖之民結茅而廬築土而坊傭牛而犁糴種而殖穀苗未立睥睨已多有橫加科斂者今宜寬侵冒之禁依乾德詔書止輸舊稅廣收募之術如咸平元豐故事勸課有勞者推恩詔從之

金史阿离合懣傳收國元年太祖卽位阿离合懣與宗翰以耕具九爲獻祝曰使陛下毋忘稼穡之艱難太祖敬而受之

劉敏行傳敏行遷肥鄉令歲大饑盜賊掠人爲食諸縣老弱入保郡城不敢耕種農事廢畝荒蕪敏行白州借軍士三十護縣民出耕多張旗幟爲疑兵敏行率軍巡邏日暮則闔民入城由是盜不

敢犯而耕稼滋殖

元史劉伯林傳伯林濟南人金末爲威寧防城千戶在威寧十餘年務農積穀與民休息鄰境凋瘵而威寧獨爲樂土

李守賢傳守賢知平陽府事太宗南伐道平陽見田野不治以問守賢對曰民貧窘乏耕具致然詔給牛萬頭

張德輝傳德輝交城人金亡北渡史天澤開府真定辟爲經歷官世祖在潛邸召見問曰農家作勞何衣食之不贍德輝對曰農桑天下之本衣食之所從出者也男耕女織終歲勤苦擇其精者輸之官餘纔惡者將以仰事俯育而親民之吏復橫斂以盡之則民鮮有不凍餒者矣

楊大淵傳大淵兄子文安充閩州安撫使閩州累遭兵變戶口凋耗文安乃教以耕桑民始復業

李德輝傳德輝爲太原守至郡崇學校表孝節勸耕桑立社倉一權度凡可以阜民者無不爲之嘉禾瑞麥六出其境

董文用傳至元八年立司農司授山東東西道巡行勸農使山東自更叛亂野多曠土文用巡行勸

勵無間幽僻入登州境見其墾開有方以郡守移刺某爲能作詩表異之於是列郡咸勸地利畢興五年之間政績爲天下勸農使之最

張立道傳立道領大司農事中書以立道熟於雲南奏授大理等處巡行勸農使佩金符其地有昆明池介碧雞金馬之間環五百餘里夏潦暴至必冒城郭立道求泉源所自出役丁夫二千人治之董文炳傳文炳爲橐城令籍縣閒田與貧民爲業使耕之於是流離漸還數年間民食以足

姚天福傳天福遷山北道按察使其民鮮知稼穡天福教以樹藝皆致蕃富民爲建祠而刻石以紀之

英宗紀至治二年詔畫蠶麥圖於鹿頂殿壁以時觀之可知民事也

呂思誠傳思誠爲景州蓳縣尹差民戶爲三等均其徭役刻孔子象令社學祀事每歲春行田樹畜勤敏者賞以農器人爭趨事地無遺力

許義夫傳義夫碭山人爲夏邑縣尹每親詣鄉社教民稼穡見民勤謹者出已俸賞之怠惰者罰之三年之間境內豐足